

## **LUHAMBA LWA PAULU KWA WAFILIPI ULONGOLERU**

Paulu kalembiti luhamba alu kwa wantu yawamjimira Yesu aku Filipi mushinja sha malongu sita na yimu Pakwiyuka Yesu, pamonga shipindi shilii pakaweriti mushibetubetu aku Rumi (1:13). Luhamba alu lulembitwi kwa shipinga sha wantu yawamjimira Yesu aku mlsruhi lwa Filipi. Twenga tuweza kulifunda kuusu lushi lwa Filipi kulawa mushintola sha Matendu ga wantumintumi. Filipi luweriti lushi lukulu lwa mkowa gwa Makedoniya. Na shiweriti shipinga sha kwanja sha wantu yawamjimira Yesu shashyanjishitwi Mumakedoniya. Na pawaweriti aku, Paulu na Sila pamuhera ndo yawashyanjishiti shipinga ashi na lishaka limu pashiru woseri watatilitwi mushibetubetu (Matendu 16).

Paulu kaweriti na vintu vivuwa vyavimtenditi kalembi luhamba alu. Yomberi katumiyyiti shipindi ashi kulonga mayagashii kwa shipinga sha wantu yawamjimira Yesu kwa mafupu womberi gawamjegeriti shipindi pawaweriti mushibetubetu (4:10-19). Yomberi kawagambiriti ntambu yaiweriti mushibetubetu kwa shipindi shilii na kuwagambira shipinga sha wantu yawamjimira Yesu kuwera wawanki na kuwashemera Timotewu na Epafuraditu su wawapanani ligoya kuwera womberi ndo walongoziya wawu (2:19-30).

## **Yagaweramu**

Paulu kanjiti shintola shakuwi kwa kushila-musiya shipinga sha wantu yawamjimira Yesu aku Filipi, shipandi sha 1:1-2

Shakapanu yomberi kawagambiriti kuusu ntambu yakuwi yaiwera na galii gakawera nagu, shipandi sha 1:3-2:30

Su yomberi kawapananiti malagaliru ga kuli-kala kwa matendu mumakaliru ga wantu yawamjimira Yesu, shipandi sha 3:1-4:9

Paulu kamaliriti kwa kulonga mayagashii kwa Wafilipi kwa mafupu gawu na kutuma mala-musiu gakuwi, shipandi sha 4:10-23

<sup>1</sup> Neni Paulu pamuhera na Timotewu wantumintumi wa Kristu Yesu,

Twankuwalembra mwenga wanagala ya-mulikolerana pamuhera na Kristu Yesu yamu-hera Filipi, pamuhera na wakulu na watanga wa shipinga sha wantu yawamjimira Yesu

<sup>2</sup> Manemu na ponga ga Mlungu Tati gwetu na ga Mtuwa gwetu Yesu Kristu gaweri pamuhera na mwenga.

### *Paulu kankuwaluwira Wafilipi*

<sup>3</sup> Nonga mayagashii kwa Mlungu gwangu kila panuwahola mwenga,

<sup>4</sup> na kila panuwaluwira woseri mwenga kwa Mlungu, nankuwaluwira kwa kunemelera,

<sup>5</sup> toziya ntambu yamuntangiti mulihengu lya Shisoweru Shiwigira kwanjira pampikaniriti mpaka leru.

<sup>6</sup> Su nwera na unakaka kuwera yomberi yakalyanji lihengu ali liherepa mngati mwenu,

hakendereyi nalu mpaka limaliriki mulishaka lilii lya Kristu Yesu.

<sup>7</sup> Su hangu ndo ntambu yanfihuwa kuwahola toziya nuwaholani mashaka goseri mumoyu mwangu. Toziya mwawoseri mwenga mtenditi pamuhera mumanemu gampananitwi na Mlungu, vinu neni pawera mushibetubetu ama paveriti mlekeziwu kwanja kushilolera hweri na kushilanguziya Shisoweru Shiwigira.

<sup>8</sup> Mlungu ndo mkapitawu gwangu kuwera nfira kuwawona mwenga kwa mafiliru galaa galii ga Kristu Yesu.

<sup>9</sup> Neni numuluwa Mlungu kuwera mafiliru genu kwongereki nentu pamuhera na umana wa unakaka na luhala lwa kila ntambu,

<sup>10</sup> su mweza kusyagula shitwatira shashiherepa na hamuweri waherepa pota na kuwera na shi-takulirwa shoseri shilii mulishaka liii lya Kristu.

<sup>11</sup> Makaliru genu hagamemiziwi vitwatira vyoseri vya nakaka vyavimfirizya Mlungu, Yesu Kristu mweni kaweza kuwapanana, kwa ukwisa na uzyumi wa Mlungu.

### *Kulikala kwa kumtendera Kristu*

<sup>12</sup> Walongu wayetu, nfira muvimani kuwera vitwatira vyoseri vyampatiti neni vintanga nentu kushiyeniziya Shisoweru Shiwigira.

<sup>13</sup> Su walolera woseri wa numba ya mfalumi pamuhera na wamonga woseri panu wavimana kuwera nwera mushibetubetu toziya neni nankumtendera Kristu.

<sup>14</sup> Na kwaneni kuwera mushibetubetu, walongu wayetu mngati mwa Kristu wavyuwa waw-

era wagangamala mukubwera shisoweru sha Mlungu pota na lyoga.

<sup>15</sup> Yanakaka kuwera wamu wawu wamubwera Kristu toziya wawera na weya na wawera wantu wa ndewu, kumbiti wamonga wankumubwera Kristu toziya wafira kuwatanga wantu.

<sup>16</sup> Womberi wankutenda hangu kwa mafiliru gaherepa toziya wankuvimana kuwera Mlungu kanupiti lihengu ali lya kushitakulira Shisoweru Shiwigira.

<sup>17</sup> Kumbiti wamonga walii yawambwera Kristu kwa moyu yagunanagala ndiri, kumbiti kwa weya pawalihola kuwera hawanongeleri neni ntabika pawera mushibetubetu.

<sup>18</sup> Hashi, nongi shishi? Neni nankunemelera payiwera wantu wankumubwera Kristu kwa kila njira, iweri kwa nfiru iherepa ama nfiru idoda, kayi hanendereyi kunemelera

<sup>19</sup> toziya nuvimana kuwera kuitira kumluwa Mlungu kwa mwenga na kwa utanga wa Rohu gwa Yesu Kristu, hanvugulirwi.

<sup>20</sup> Mata yaneni nkulu na litumbiru lyangu, ndo kuwera hapeni nsindi mulihengu lyangu, kumbiti vipindi vyoseri asa mushipindi ashi, hanumkwisi Kristu mumakaliru gangu, panlikala ama pa-howwa.

<sup>21</sup> Nulikala kwa kumtendera Kristu na kuhowa kwaneni mota.

<sup>22</sup> Handa panendereya kulikala neni hanwezi kutenda lihengu lyaliwera na mota nentu. Hashi, neni nsyaguli shishi? Neni nuvimana ndiri.

<sup>23</sup> Neni nkwegwa wega mbili. Neni nfira nentu kulawa munshimba ayi na nulikoleri pamuhera

na Kristu, shitwatira ashi shiweza kuwera shiherepa nantu,

<sup>24</sup> kumbiti iherepa nantu kwamwenga nenipanendereya kulikala.

<sup>25</sup> Neni nwera na unakaka na shitwatira ashi, nuvimana kuwera nenihansigali na hanendereyi kulikala pamuhera na maweni mwenga woseri, su mpati kwongera munjimiru yenu pamuhera na nemeleru,

<sup>26</sup> su neni pawera na mwenga kayi, mwenga hamuweri na toziya ya kumtumbira Kristu Yesu kwa ntambu yakantendiriti.

<sup>27</sup> Su shitwatira shiherepa ndo shiwera mgenderanu gwenu gulikolerani pamuhera na Shisoweru Shiwigira sha Kristu ntambu yayifiruwa, su handa paweza kwiza kwa mwenga kuwawona ama pampikanira mwenga, neni hanuvimani kuwera mwenga mgangamala pamuhera na nfiru yimu na viraa muvikomi ngondou kwa pamuhera na muwera na nfiru yimu toziya ya njimiru ya Shisoweru Shiwigira.

<sup>28</sup> Namuwatira kwa ntambu yoseri ilii wantu yawawalema, ayi hayiweri lilangaliru kwawu kuwera hawagamili, kumbiti mwenga hamlopoziwi na Mlungu.

<sup>29</sup> Toziya mwenga mpananwa upendelewu wa kumtendera Kristu, kumjimiru ndiri hera kumbiti kutabisiwa toziya ya yomberi.

<sup>30</sup> Vinu muweza kutenda pamuhera naneni kuzikoma ngondou. Ngondou azi ndo zilii zyamuziwoniti panuzikomiti pa lupaga na nankali nankuzikoma mpaka vinu ntambu yampikanira.

## 2

*Unanagala na ukulu wa Yesu*

<sup>1</sup> Makaliru genu kwa kulikolerana pamuhera na Kristu gawatenda mgangamali na mafiliru gakuwi gawatula moyu. Mwenga muwera na umu kwa kuwera pamuhera na Rohu Mnanagala na muweri na lusungu na mulilekiziyani maweni.

<sup>2</sup> Su nuwaluwani mwenga kuwera mmaliliri nemeleru ya neni kwa kuwera na liholu limu na kwa kuwera na ufiru umu na moyu gumu na nfiru yimu.

<sup>3</sup> Namtenda shoseri kwa moyu gwa ufyangu ama kwa kulitumba hera, kumbiti muwera na unanagala maweni kwa maweni na kila yumu kamloli muyaguwi kaherepa kuliku mweni.

<sup>4</sup> Kila yumu gwenu nakasakula mota yakuwi mweni hera kumbiti kasakuli mota ya muyaguwi.

<sup>5</sup> Muwera na liholu ali ntambu yakawera nalu Kristu Yesu

<sup>6</sup> mweni kwa ntambu yakuwi kaweriti Mlungu, kumbiti kaliholiti ndiri kuwera sawa na Mlungu ndo shintu sha kulemetera kwa makakala.

<sup>7</sup> Su kwa kufira mweni kalitenditi kuwera shintu ndiri, kawera ntambu ya mmande, kiwukitti muntu na kawoneka kwa ntambu ya wantu.

<sup>8</sup> Yomberi kananagaliti mweni na kajimiriti mpaka kuhowa, kuhowa kweni kahowiti palupingika.

<sup>9</sup> Toziya ayi, Mlungu kamkwisiti pahala pampindi nentu na kamupananiti litawu lyaliwera pambindi pa matawu goseri,

**10** su kwa ligoya lya litawu lya Yesu kila linung'unu halisuntami na vintu vyoseri vya kumpindi kwa Mlungu na pasipanu pa pasipanu,

**11** na kila lulimi halilongi kuwera Yesu Kristu ndo Mtuwa, kwa ukwisa wa Mlungu yakawera Tati gwestu.

### *Gulangala gambira ntondu*

**12** Walongu wangu, ntambu yamunjimiriti shipindi shoseri neni pawneriti na mwenga, ata vinu pawera patali na mwenga mwendereyi kunjimira. Kwa kutila na kulendemera mlanguziyi kwa vitendu, toziya ya ulopoziya wenu,

**13** toziya Mlungu ndo yakatenda lihengu mngati mwenu shipindi shoseri na kuwapana uwezu wa kufira na kuvitenda vitwatira vyavigenderana na mpangu gwakuwi mwensi.

**14** Mtendi kila shintu pota na kuhinginika ama likakatala,

**15** su muwezi kuwera waherepa na yawahera lawama, wana wa Mlungu yawahera vidoda mu-pasipanu. Hamlangali pakati pawu gambira ntondu pazilangala kulyera,

**16** pamushikola hweri shisoweru sha ukomu. Handa pamtenda hangu, neni hanweri na toziya ya kulitumbira mulishaka Kristu pakawuya, tembera halilanguziyi kuwera kalikamaziya na lihengu lyangu lyagamiliti ndiri hera.

**17** Ata neni pandaviwa gambira shijungu sha kulanda mutambiku na utendera wa njimiru yenu, neni nseklera nentu na nemelera pa-muhera na mwawoseri mwenga.

**18** Kwa ntambu iraayi, mwenga vilaa mfiruwa kunemelera pamuhera naneni.

### *Timotewu na Epafiraditu*

**19** Kwa litawu ly a Mtuwa Yesu ntumbira handa numtuma Timotewu kwa mwenga ulaa vinu, su nwezi kuwera na moyu pampikanira visoweru vya mwenga.

**20** Nahera muntu gwingi gambira yomberi yakawatendera mwenga kwa moyu.

**21** Wamonga woseri wankuvitenda ndiri vitwatira vya Yesu Kristu, kumbiti wankuvitenda vitwatira vyawu weni.

**22** Maweni mwenga muvimana ntambu Timotewu kawera na unakaka, neni na yomberi gambira mwana na tati gwakuwi, tutenda pamuhera lihengu ly a Shisoweru Shiwagira.

**23** Su ntumbira hanumtumi kwa mwenga mala panuvimana ntambu vitwatira paving'endera.

**24** Na nankumtumbira Mtuwa handa neni vilaa hanizi ulaa vinu.

**25** Mwona numtumi kwa mwenga mlongu gwetu Epafiraditu, ayu mtenda lihengu muyangu na mungondu viraa ndo mjumbi gwenu yakantangiti mumafiliru gangu.

**26** Kanayu nfiru ngulu ya kuwalolani mwenga mwoseri na kahinginika nentu, mwenga mpata visoweru hangu kaweriti mlweri.

**27** Yina, kaweriti mlweri pakwegera na kuhowa. Kumbiti, Mlungu kamwoneriti lusungu na gweka yakuwi ndiri, ira na neni vilaa su mbananwi ndiri utama nentu.

<sup>28</sup> Su nfira nentu kumtuma kwa mwenga, su pamwona mpati kunemelera kayi na hinginika yangu iwuki.

<sup>29</sup> Mumuwanki, su kwa nemeru yoseri gambira mlongu Mumtuwa. Mfiriwa kuwalanguziya wantu wawera gambira mweni.

<sup>30</sup> Toziya yomberi kaweriti pakwegera na kuhowa toziya ya lihengu lya Kristu na kaponeka mmakaliru gakuwi su kawezi kunupa nenii utanga ulii mwenga muweza ndiri kuujega maweni mwenga.

### 3

#### *Ukamilika wa nakaka*

<sup>1</sup> Kwa kongelera, walongu wayangu, mnemeleri kwa kulikolerana pamuhera na Mtuwa. Hapeni ntoki kuwuyira galii ganembiti kala palupaga palii, toziya hagawawongeleri ulolera.

<sup>2</sup> Mulisheli na wantu yawatenda ukondola, awa wawera gambira wang'ang'a, yawa lazimisha wantu wingiziwi jandu.

<sup>3</sup> Wantu yawayingiziwa jandu nakaka ndo weni ndiri, kumbiti ndo twenga yatumguwira Mlungu kuitira Rohu gwakuwi, na kunemelera kwa kulikolerana pamuhera na Yesu Kristu. Vitwatira vya kunja hapeni tuvisherri.

<sup>4</sup> Neni vilaa menwezi kulitumbira vitwatira avi vya nshimba, handa kwana muntu kaweza kuitumbira vitwatira avi vya nshimba, neni nana toziya nkulu munshimba kugahola aga,

<sup>5</sup> neni wanyingiziya jandu lishaka lya nane pa kuyiwuka kwangu, neni muntu gwa isi ya Israeli

na likabila lya Benjamini na Mwebraniya nakaka.  
Kugatenda malagaliru, neni nweriti Mfalisayu,

<sup>6</sup> na neni nweriti na gangamalu nentu ata nu-  
shipunjiti shipinga sha wantu yawamjimira Yesu.  
Kuusu uheri yawuwoneka kwa kugajimira mala-  
galiru, neni nweriti ndiri na shidoda shoseri shili.

<sup>7</sup> Kumbiti goseri aga geni menwezi kugahola  
kuwera ndo mota, nugawona kuwera ndo shintu  
ndiri kwajili ya Kristu.

<sup>8</sup> Yina aga ndiri, ira mona kila shintu shiwera  
shintu ndiri toziya ya shitwatila shiherepa nentu,  
yaani kummana Kristu Yesu Mtwa gwangu.  
Toziya yakuwi njimira kwasira kutali kila shintu,  
nugawona goseri aga ndo shinyankali su numu-  
pati Kristu

<sup>9</sup> na kulikolela nayu nakamu. Neni nema kayi  
unakaka ulawira na kulijimira lilagaliru. Vinu  
nanawu uheri ulii yawuwoneka mukumjimira  
Kristu, uheri yawulawa kwa Mlungu na yawuli-  
tumbira njimiru.

<sup>10</sup> Shanfira ndo kummana Kristu na kwona  
makakala ga uzyuka wakuwi, kuyitenda ndabiku  
yakuwi na kulifana nayu mukuhowa kwakuwi,

<sup>11</sup> ndo shintu sha matumbiru handa neni vilaa  
hanzukisiwi.

### *Kuwoneka kuwera muheri palongolu pa Mlungu.*

<sup>12</sup> Hapeni nulitumbi handa mpata kala  
ama nweriti nahera vidoda. Nankwendereya  
kushashatika kupata lifupu lyeni Kristu Yesu  
kanupiti kala neni.

<sup>13</sup> Nakaka walongu wangu hola ndiri kuwera  
mpatiti kala lifupu ali. Kumbiti shitwatila shimu

nankutenda, nankugawaluwa galii gapititi kala na kutenda gangamalu kugalola nweri galii ga kulongolu.

<sup>14</sup> Su nankutugira mpaka upeleru wa mashindanu, su mpati lifupu ali lyeni ndo ukomu wa mashaka goseri awu ndo ushemi wa Mlungu kwa njira ya Kristu Yesu.

<sup>15</sup> Twenga twawoseri tukamaliti mumakaliru ga Kristu tufiruwa kuwera na ugolokeru ulaa awu. Kumbiti handa wamu wenu walihola ntambu yimonga, su Mlungu hakakulanguziyeni shitwatila ashi.

<sup>16</sup> Kwa vyoseri tusegeleri kulongolu munjira iraa ilii yatuyifata mpaka vinu.

<sup>17</sup> Walongu wangu, mwendereyi kufata mfanu gwangu. Tuwapanani mfanu muheri na hangu muwapikaniri walii yawafata mfanu gwetu.

<sup>18</sup> Nuwagambre ni kala shitwatila ashi mala zivuwa na vinu mbuya kayi kwa masozi, wantu wavyuwa walikala gambira wadoda kwa kuhowa kwa Yesu Kristu mlupingika.

<sup>19</sup> Upeleru wawu ndo kuharabisiwa, mata zyawu zya nshimba ndo Mlungu gwawu, wankuwona ukwisa muvitwatira vyawu vyasoni, waliholera hera vitwatira vyamuisi.

<sup>20</sup> Kumbiti twenga twa wantu wa kumpindi kwa Mlungu na twankulolera kwa mata nkulu, mponiziya kizi kulawa kumpindi, Mtwa Yesu Kristu.

<sup>21</sup> Yomberi hakazigalambuziyyi nshimba zyetu ziyonda na kutenda zilifani na nshimba yakuwi nanagala, kwa makakala galii geni nakaka kaweza kuvitula vintu vyoseri pasi pa

ukolamlima wakuwi.

## 4

### *Visoweru vya kutula moyu*

<sup>1</sup> Su walongu wayetu, yanuwafira nentu na kufira kuwawona, mwenga nemeleru yaneni na lijenjeri lya ukanga waneni, mwenga waganja wangu hangu ndo ntambu yamfiruwa kugangamala mukulikolerana pamuhera na Mtuwa.

<sup>2</sup> Nankuwaluwa awa wantu wawili Eudiya na Sintiki, mjimirirani Mumtuwa.

<sup>3</sup> Na vilaa nukugambira gwenga mtenda lihengu muyangu, guwatangi wadala awa, tembera watenda lihengu pamuhera na nenii kushyenezeya Shisoweru Shiwigira, pamuhera na Kilementi na watenda lihengu wayangu wamonga woseri, walii matawu gawu galembwa mushindola sha ukomu.

<sup>4</sup> Su mnemeleri shipindi shoseri mukulikolerana pamuhera na Mtuwa nankulonga kayi, mnemeleri.

<sup>5</sup> Unanaga wenu umaniki kwa wantu woseri. Mtuwa kapakwegera.

<sup>6</sup> Namuvera na lyoga na shintu shoseri, kumbiti kwa kila shintu kwa kumluwa Mlungu na kukosiya pamuhera na kulonga mayagashii, mumgambiri Mlungu mafiliru genu.

<sup>7</sup> Na ponga ya Mlungu yayipitayi luhala lyoseri lya wantu, haliloleri myoyu na maholu genu mukulikolerana pamuhera na Kristu Yesu.

<sup>8</sup> Upeleru, walongu wayangu, muviloni hweri vitwatira viheri, shashijimirwa na Mlungu shifiruwa kukwiswa, viherepa, vitwatira vyavikamili-ka kulongolu kwa Mlungu, vya viherepa na vya kuherepeziya na ligoya.

<sup>9</sup> Mgatendi galii gamlifunditi na kuwanka kula-wa kwa neni, vitwatira vya mpikaniriti ntakula na kuwona gantenda. Na Mlungu yakawapanana wantu ponga hakaweri pamuhera na mwenga.

### *Mayagashii kwa mafupu ga Wafilipi*

<sup>10</sup> Mukulikolerana pamuhera na Mtwa mpata nemeleru ngulu kuwera upeleru mwenga mpatiti kayi lupenyu lya kulanguziya kuwera mwankuhola.

<sup>11</sup> Ntakula ndiri vinu toziya nfira shintu, toziya nulifunda kujimilira na vintu vyawera navi.

<sup>12</sup> Nuvimana ntambu ya kuwera na vintu vivuwa na nuvimana ntambu yakuwera pota na vintu. Nulifunda bada ayi, su kwa ntambu yoseri na shipindi shoseri, neni paweri na viboga ama pawera na njala, ama pawera na vyavisigaliti ama vivuwa ndiri.

<sup>13</sup> Neni weza kutenda kila shintu kuditira Kristu yakamupanana makakala.

<sup>14</sup> Kumbiti mwenga mtenditi viherepa kwa kun-tanga neni muntabika zyangu.

<sup>15</sup> Mwenga Wafilipi muvimana maweni kuwera palupaga pa kushibwera Shisoweru Shi-wagira, paweriti nankuwuka Makedoniya, mwenga shipinga sha wantu ywamjimira Yesu yamun-tangiti, gweka yenu ndo yamumtenditi pamuhera na neni na kuwapanana wamonga mafiliru.

**16** Ata nenii pawneriti aku Tesaloniki muntangiti mala zivuwa.

**17** Nfira ndiri kufira mafupu kulawa kwa mwenga, kumbiti nfira mota yongerekii muluhanja lwenu.

**18** Su wanka kala vintu vyoseri vyamnupiti, kayi na nentu kuliku vyanfiriti. Nana kila shintu kwa vinu Epafiraditu kanjegera kala lifupu lyenu. Lifupu ali ndo gambira shijungu shana utuli uherepa, shijungu shijimilika na tambiku yay-imuherepelera Mlungu.

**19** Su Mlungu gwangu kwa ulunda wakuwi mkulu na muwukwisa wakuwi kuitira Kristu Yesu, hakawapanani mafiliru genu.

**20** Ukwisa uweri kwa Mlungu ghetu yakawera Tati ghetu, mashaka goseri. Yina hangu.

### *Malamusiwu ga upeleru*

**21** Nankuwalamsiya wantu woseri wa Mlungu yawawera wakuwi Kristu Yesu. Walongu yawawera panu pamuhera naneni wawalamsiya.

**22** Wantu woseri wa Mlungu panu, na nentu walii yawawera mnumba ya Kaisari, wawalamsiyani.

**23** Manemu ga Mtuwa ghetu Yesu Kristu gaweri pamuhera na rohu zyenu.

## **Lipatanu Lya Syayi Kwa Wantu Woseri The New Testament in Pogoro**

copyright © 2014 Pioneer Bible Translators

Language: Pogolo

Contributor: Pioneer Bible Translators

### **The New Testament in Shipogoro**

This translation, published by Pioneer Bible Translators and The Word for the World, was published in 2014.

If you are interested in obtaining a printed copy, please contact The Word for the World at [www.twftw.org](http://www.twftw.org).

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2019-12-30

---

PDF generated using Haiola and XeLaTeX on 18 Apr 2025 from source files dated 29 Jan 2022

be0eb903-ba79-5fbd-8667-f25c3cab4358